



Proxecto de orde pola que se modifica a Orde do 26 de outubro de 2000 pola que se regula a extracción de semente de mexillón en bancos naturais.

Mediante a Orde do 26 de outubro de 2000 régulase a extracción de semente de mexillón en bancos naturais, cuxo obxecto é regular o abastecemento dos viveiros con semente de mexillón procedente de banco natural, as habilitacións, zonas e períodos de extracción e as cantidades máximas a extraer en cada zona. Entre as obrigas dos titulares das habilitacións está a de remitir, dentro dos quince días seguintes ao final de cada período de extracción, unha relación das cantidades extraídas, indicando polo miúdo o lugar e data da recolección.

Por medio da presente modificación introdúcese a utilización dunha aplicación informática para terminais móbiles que facilitará ás persoas recolectoras cumprir coa súa obriga de comunicar á Administración a información requirida nesta orde de xeito instantáneo, o que permitirá avaliar de forma máis axeitada o estado do recurso para alcanzar o máximo rendemento sostible, optimizar a dispoñibilidade de semente de mexillón, segundo avance a campaña de extracción, e dispoñer de información sobre os períodos e as zonas óptimas para a recollida.

Por outra banda, esta aplicación permitirá a identificación das persoas autorizadas para levar a cabo a extracción de semente de mexillón conforme ao establecido nos capítulos II e III da Orde do 26 de outubro de 2000, isto é, as persoas concesionarias de viveiros ou persoas traballadoras que pertencen á súa empresa, así como as persoas recolectoras pertencentes a confrarías ou agrupacións de mariscadores en virtude dos acordos subscritos a tal efecto.

A utilización desta nova aplicación informática para terminais móbiles suporá facilitar a comunicación coa Administración a efectos estatísticos e científicos, así como un paso máis para garantir a seguridade xurídica do titular do establecemento de acuicultura, por canto o documento que o produtor xere na aplicación amparará o lote ou lotes de mexilla durante o seu traslado por vía terrestre ou marítima ata o viveiro de destino.

En consecuencia, en virtude das facultades conferidas polo artigo 34 da Lei 1/1983, do 22 de febreiro, de normas reguladoras da Xunta e da súa Presidencia,

DISPOÑO:

Artigo único. *Modificación da Orde do 26 de outubro de 2000 pola que se regula a extracción de semente de mexillón en bancos naturais*

A Orde do 26 de outubro de 2000 pola que se regula a extracción de semente de mexillón en bancos naturais, queda modificada como segue:

Un. Modifícase o artigo 6, que queda redactado como segue:

«Artigo 6. *Declaración da extracción e identificación das persoas autorizadas*

1. As persoas autorizadas para a extracción de semente de mexillón procedente de bancos naturais conforme ao establecido nos capítulos II e III da presente orde, deberán realizar, ao finalizar os labores de recolleita en cada localización, a declaración da mexilla extraída a través da aplicación informática para terminais móbiles que se porá a súa disposición.

Esta declaración deberá incluír:

- A cantidade de semente de mexillón recollida, expresada en kilogramos.
- O viveiro de destino da semente de mexillón.
- A data e a zona de recolección.
- A localización da zona recolección, mediante a xeolocalización do terminal móbil desde o que se realiza a declaración.
- Identificación dos transportes terrestres e/ou marítimos autorizados para realizar as tarefas de recollida e traslado da semente de mexillón.

2. Cos datos de cada declaración xerarase un documento, que amparará o traslado da semente de mexillón desde a zona de recolección ata a batea de destino. Emitido o documento, no prazo de 24 horas a persoa concesionaria poderá realizar unha distribución das cantidades entre os diferentes viveiros dos que sexa titular, sen sobrepasar a cantidade declarada inicialmente. O documento inicial quedará anulado, e xerarase un novo documento para cada unha das bateas nas que se fixo o reparto.

3. As persoas autorizadas para a extracción disporán na aplicación informática dun xustificante da súa autorización, que exhibirán xunto con documento nacional de identidade a petición da autoridade competente.

4. A non realización da declaración dará lugar ao inicio do expediente sancionador que corresponda de acordo co disposto no título XIV da Lei 11/2008, do 3 de decembro, de pesca de Galicia».

Dous. Suprímese o artigo 9, que queda sen contido.

Disposición derradeira única. *Entrada en vigor*

Esta orde entrará en vigor o día seguinte ao da súa publicación no *Diario Oficial de Galicia*.

Santiago de Compostela,

Alfonso Villares Bermúdez
Conselleiro do Mar